


Fasnacht 2009



Sujet: „Pension zur Fläsche“

Mir Fratze könne im Momänt sehr guet lache
hän dankt: „E Pension für Fläsche sött me ufmache“.
In dere schwere Zyt hän mir überleggt und investiert,
Fläsche kasch überall finde das hän mir schnäll kapiert.

Wenn gwüssi Lüt Mischta baue und Schuld sin an dr Krise,
nämmet se und dient se in unseri Fläsche-Pension iwiise.
Ob Persone us dr Wirtschaft, Politik oder sunscht vo wo,
in unserer Pension hän mir bis jetzt jedi Fläsche ufgnoh.

Welle Eidgenoss söll denn d'Armee zum Sieg fiehere,
keine will sich warm aziehe, viel lieber diehn mir friere.
Gäld usgäh für dä grien Verein, do sin mir die Beschte,
dass es denn jo nid längt für an d'Euro 2008 go feschte.

Fläschene wie zum Bispiel Blocher, Ospel, Näf und Co.
sin willkomme und dörfe gärn bi uns in d'Pension ko.
Au dr Berlusconi, Jackson oder sunscht e Internationale,
ka bi uns e Zimmer miete, wenn är gnueg duet zahle.

Dr prominäntischi Gast wo in unserer Pension duet liege,
isch notürlich dr Bush, wo verseit het in all sine Kriege.
Zyt isch es worde, dass dr Barack das Amt het überno,
denn kei Wunder, bim andere fliege au uns d'Schueh drvo.

Dr Mr. UBS Cello Ospel het in sine letschte Joore
viel Gäld an dr Börse und au sunscht überall verlore.
Mir hänn Mitleid mit ihm, sinere Frau und em Sohn
drum nämme mir ihn au uff, in unserer Fläsche-Pension.

Me gseht's, mit unsere Idee hän mir e Marktflugge entdeckt,
mängi Fläsche hän mir gfunde und in d'Pension gschteckt.
So lang's überall Versager git könne mir vo däm läbe,
uns Fratze dien all die Fläschene guet, s'isch e Säge!

Mir sage: „Danggschön euch Fläschene, für unsere Lohn
und heisse alli hätzligg willkomme in dr Fläsche Pension“!

E schöni Fasnacht!